

XXIII. IGANDEA URTEAN ZEHAR (A)

Otoitza

Jainko Jauna, Zuk gaituzu salbatzen
eta zeure seme-alabatzat hartzen;
ikus begi onez hain maite dituzun zeure seme-alabak,
eta Kristorengan sinesten dugunoi
emaguzu egiazko askatasuna eta betiko bizia.
Zure Seme Jesu Kristo.

I. IRAKURGAIA: Ez 33, 7-9

*Gaiztorai hitzegiten ez badiozu,
haren odolaren kontua zuri eskatuko dizut.*

Ezekiel Profetaren liburutik

Honela dio Jaunak: «Adanen seme, zu Israel etxeko begirale ipini zaitut. Nire ahoko hitzak entzuten dituzunean, oihu egingo diezu nire izenean. Nik gaiztoari esaten badiot: "Gaizkile, heriotzara galdua zaude", eta zuk hitzegiten ez baduzu, hura jakinaren gainean egon dadin eta bere jokabide okerra alda dezan, gaiztoa bere erruz hilko da, baina haren odolaren kontua zuri eskatuko dizut. Baina zuk jakinaren gainean jartzen baduzu gaiztoa, bere jokabide okerra alda dezan, eta hark aldatzen ez badu bere jokabide okerra, hura bere erruz hildo da; zuk, ordea, salbatu izango duzu zeure bizia».

ERANTZUN SALMOA: Sal 94, 1-2. 6-7abc. 7d-9

**R/. Entzungo al duzue gaur Jaunaren mintzoa:
«Ez gogortu zuen bihotza».**

Zatozte, pozez oihu degiogun Jaunari,
txalo degiogun salbamen dugun Harkaitzari.
Hurbil gakizkion aurrera esker-kantuekin,
jai degiogun txalo ete eresiekin. R/.

Zatozte, ahozpez jaurets dezagun,
egin gaituen Jaunari belaunika gakizkion.
Bera baita gure Jainkoa,
gu, berriz, Haren larreko herria,
Haren zainpeko artaldea. R/.

Entzungo al duzue gaur Haren mintzoa:
«Ez gogortu zuen bihotzak Meriban bezala,
Masa-egunean basamortuan bezala.
Zuen gurasoek han zirikatu ninduten,
Nik eginak ikusi arren, tentatu ninduten.» R/.

II. IRAKURGAIA: Erm 13, 8-10

Maitatzea da Lege osoa betetzea.

San Paulo Apostoluak Erromatarrei

Senideok: Ez eduki zorrik inorekin, elkar maite izatekoa besterik. Maite duenak, bete du Legea. Izan ere, harako «ez ezkontzarik nahasi, ez inor hil, ez lapurtu, ez grinaz irrikatu», eta beste edozein agindu, hitz honetan biltzen da: «maita lagunurkoa zeure burua bezala». Lagunurkoa maite duenak, ez dio gaitzik egiten. Maitatzea da, beraz, Lege osoa betetzea.

EBANJELIOA: Mt 18, 15-20

Aleluia: 2 Kor 5, 19a. c

R/. Aleluia.

V/. Jaungoikoa mundua Berekin adiskidetzen ari
zen Kristorengan,
eta guri eman zigun adiskidetzearen hitza. R/.

Entzuten badizu, irabazi duzu zeure anaia.

Jesu Kristoren Ebanjelioa San Mateoren liburutik

Aldi hartan, Jesusek honela esan zien bere ikasleei:

«Zure anaiak hutsegiten badizu joan eta aitorraraz iezaiozu zuen bion artean bakarka. Entzuten badizu, irabazi duzu zeure anaia. Entzuten ez badizu, har itzazu zeurekin beste bat edo bi; bi edo hiru testiguren hitzak erabaki dezan gauza. Eta haiei entzuten ez badie, esan elkarteari. Eta elkarteari ere entzuten ez badio, arrotz edo zergalari bezala izan bedi zuretzat.

Benetan diotsuet: zuek lurrean lotua, zeruetan ere lotua izango da; eta zuek lurrean askatua, zeruetan ere askatua.

Benetan diotsuet hau ere: zuetako bik elkar hartzen badute lur honetan zerbait eskatzeko, emango die zeruetan dagoen nire Aitak. Izan ere, bi edo hiru lagun nire izenean bildurik dauden batzarrean, han nago Ni haien erdian».

Oparigaien gainekoa

Jainko Jauna, bakearen eta egiazko maitasunaren iturria,
iguzu, eskaintza honekin zure handitasuna gorets dezagula
eta, sakramentu hau harturik,
gogo leialez Zurekin bat egin dezagula.
Jesu Kristo.

Jaunartze ondorengoa

Jauna, zure fededunak hitzaren eta sakarmentuaren janariaz
hazten dituzu eta biziberritzen;
emaguzu, zure Seme maitearen dohain handiz baliaturik,
beti Berarekin bat eginik bizitzea.

Errege bizi baita.